

Lesson 55

Nabi Shi'ya (Isaya)

Shi'ya

Assalamu alaikum me' bagayku mapakalehin. Tiya' ku katakdilan we' Tuhanin magaka-aka si ka'am. Iye Tuhan po'on kasanyanganin. Kabaya'annen, we' kēmon me' a'ahin tasabutde duk maglilla' nuhut lān bakas minemesnen, supaya a'ahin makajari kinimatan bentel we' ne duk supaya siye sinakup dem kasanyanganne te'edin salama-lama. Sinna kami we' makajari kami magpakale balik si ka'am ellew inin programabi inēnan “*Lānin duk a'ahin marjari bentel si matahan Tuhan*”.

Si lesson dehelluhin ta'ayate istori sabab Nabi **Yunus** iye manuleyan malahi amban TUHANIN. Saguwa' bang a'ahin nuley lahi amban Tuhanin kuwe' bentuk suleyanne lahi amban lingewne. Patuhut Tuhanin pu si Nabi Yunus bisan diyalem kenna hadje!

Ellew inin matsa kite bi sabab dembuwa' nabi mapaturul pu disi Nabi Yunusin duk bantu ēnnen dem Kitab Masutsihin. Inin Nabi **Shi'ya (Isaya)**, ellum iye me' pitu' hatas tahun dehellu amban inanakan AlMasihin. Nabi Shi'ya inin dembuwa' iye imam maghinang si Tuhan si langgal mahadje bakas hininang we' Sultan Sulaymanin. Kahaba' ellew nōng Nabi Shi'ya duk me' imam sinduwehin si Tuhan kurban hayep diyata' pagkurbananin. Me' kurbanin umbaga'an AlMasi, iye mabu'us laha'nen pamuwas duse manusiya'in.

Pakale ka'am bang ine palabey pu si Nabi Shi'yahin dembuwa' ellew sasangne la'i dem langgal Tuhanin. Dem jūd Shi'ya, kapitulu ennem nulat Nabi Shi'ya, pa'inne:

(Shi'ya 6) ¹ *Si tahun kamateyan Sultan Ussiyahin, takiteku Magbaya'-baya'in ningkolo' diyata' kursine langkew duk pinahadje, duk tuggu' semmeknen mekepenno' langgal.* ² *Si atagne niya' me' serapim (mala'ikat sakabayu') para dembuwa' siye ennem peppikden: duwe peppikden gunade pangelligde luwede, duwehin gunade pangelligde bettisde, duk duwehin gunade bang siye palayang.* ³ *Duk maglingan siye pī si sawe'den, pa'inde: “Sutsi, sutsi, sutsi TUHAN Mabalakatanin; bantu iye dem kēmon dunya.”* ⁴ *Sabab helling suwaladen hodjog me' lingkuran olom langgalin duk penno' langgalin we' umbu.* ⁵ *Pa'inku, “Allo! Lepas ne ku! Pegge' kēmon bissāku mapaguwa' amban*

behekun dusehan du, duk patenna'ankun diyalem bangsa bissāhanden dusehan. Duk masi pe, takiteku duk di mataku Sultanin, TUHAN Mabalakatanin."⁶ *Ubus dembuwa' me' serapimin palayang pī si aku duk niya' bale bo'one. Bakas ānнанne balehin amban pagkurbananin duk kesipit.*⁷ *Singkune behekun duk balehin duk pa'inne, "Siningku ne behenun duk inin. Kuwe'itu puwas ne utangnu magdusehin, inampun ne duserun."*⁸ *Ubus takaleku suwala Tuhanin, pa'inne, "Sine dina'akku mapihin? Sine pamasanankun?" Ubus pa'inku, "Aku ne! Da'akun ne ku pī!"*

Sa miya'an pinabagala we' Tuhanin hadjenen duk sutsinen pu Nabi Shi'ya duk pene'ne iye magmahalayak Lapalnen si me' a'a Isra'el, hātinen me' Yahudihin, duk da'akne iye nulat Lapal Tuhanin diyalem libru supaya isab makahampit me' tumbu' dembulihin. Taha' jūd Shi'yahin duk lalem duk ga' niya' taymte matsa kēmon diyalemnen. Saguwa' makajari papandakte lapal Nabi Shi'yahin, me' importantehin duwe inin.

Ka'issa', inakahan me' Yahudihin we' Nabi Shi'ya aka-aka la'at sabab me' duseden duk pangalegga mamatalep si duseden.

Kaduwe, inakahan siye we' Nabi Shi'ya **Aka-aka Hāp** sabab AlMasi mapitu si dunyahin mananggungan pangalegga duseden.

Hangkan bang papandakte pina'innen, lapal Nabi Shi'yahin inin:

- 1.) **aka-aka la'at sabab duse duk pangaleggenen; duk**
- 2.) **Aka-aka Hāp sabab dembuwa' Manimbul mananggungan pangalegga madusehanin.**

Batsate dahu' me' ayat sinduwe magpakite me' **aka-aka mala'at** inaka we' Tuhanin pu Nabi Shi'ya supaya mahalayakne si me' a'a Yahudihin duk pu sine-sine ngatu pakale. Si kapitulu dembuwa' nulat Nabi Shi'ya, pa'inne:

(Shi'ya 1)² **Pakale ka'am, langitin duk dunyahin! Pegge' bakas missā TUHANIN, pa'inne:** "Tigtuku mākanakin, saguwa' kuntarahande ku."³ **Hāp pe sapi'in, kata'uhande depu'nen, duk asnuhin kata'uhande pagpakanan amuden, saguwa' me' a'a Isra'elin ga'i kata'uhande, me' a'akun ga'i tasabutde."**⁴ **Ah, bangsa dusehan ka'am, me' a'a tegeb ka'am we' duse, tubu' maghinang la'at ka'am, mākanak maka'at ka'am! Teyikutande TUHANIN; ga'i siye ngatu nuhut Tuhan bangsa Isra'el masutshin duk teyikutande pe iye.**¹³ **Padeheng ne ka'am magkurban mangga' niya' kagunahannen! Kabunsihanku ne kamanyan tinugtugbin. Kādja'anbi bang paguwa' bulan ba'ahuhin, atawa me' Sabtu' atawa me' pagtipunanbi magāgamahin – jumu' ne ku si me' pagtipunanbi mala'atin.**¹⁴ **Bunsi ku si me' kādja'anbi kahaba' paguwa' bulan ba'ahuhin duk kādja'an ellew li'i. Kabohatan**

ku we' de; pekkeng ku nandalanne. ¹⁵ *Bang nawut ka'am ngampun-ngampun ga'i ne ku mayam; bisan ka'am daran ngampun-ngampun ga'i ku pakale!*

Sa miya'an inamāhan me' Yahudihin we' Nabi Shi'ya pegge' magmā-mā bē'āgama siye. Papandakne bissā sabab duseden, pa'inne: **“Pa'in TUHANIN: ‘Me' a'a inin, pahadjede ku duk behede saguwa' ateyden ga'i nuhut aku. Pa'inde we' sambahayangde ku; saguwa' pagtolo'den sara' panolo' a'a hadja!’”** (Mateo 15:8; Shi'ya 29:13)

Pag ubus amāhan Nabi Shi'ya me' Yahudihin pegge' tuwas kōkden duk dusehan siye, nagna' ne iye magaka me' Aka-aka Hāp. Aka-aka inin balakatan ngalimpiyuhan atey kēmon makahagadin. Na, kuwe'itu pakale ne kite bi si me' bissā sinduwehin, hāp manamal sinulat we' Nabi Shi'yahin sabab AlMasi, iye mapitu si dunya nimbul madusehanin. Bakas sulatne, pa'inne:

Pa'in TUHANIN, “Dayi' ka'am, magsara' ne kite bi. Bisandusebin peyat kuwe' laha', makajari du ngapote' kuwe' kakana'; bisandusebin peyat manamal ngapote' du kuwe' gapas!” (Shi'ya 1:18)

(Shi'ya 40) ¹ *“Pahemokanun bi me' a'akun,” pa'in Tuhanin, “pahemokanun bi siye.”* ³ *Niya' suwala ngalingan, pa'inne: “Memesun bi lān para si TUHANIN dem lahat matoho'in, ngahinang ka'am lān hāp duk bentel dem lahat ga' niya' a'ane para si Tuhanten bi.* ⁴ *Kēmon lebbakin subey pinerno'an, kēmon punu duk kūdin subey dinatagan, me' maglettud-lebbakin subey pinasadan duk me' bīdin dinatagan.* ⁵ *Ubus bu pinabagala du sahaya TUHANIN, duk kēmon manusiya'in takitede du. TUHANIN dihananne mananggupin.”* ⁹ *Ka'am, a'a Siyonin, mam'o pasan mahāpin, mana'ik ka'am diyata' punu langkew. Ka'am, a'a Awrusalamin, mam'o pasan mahāpin, ngalingan ka'am papales. Papalesun bi suwalabin, da'a ka'am tinalew; akahanun bi me' puweblo Yahudiyahin, pa'inun bi, “Tiya' du Tuhanin!”* ¹⁰ *Payamanun bi, pitu du TUHAN Magbaya'-baya'in makitehan balakatnen!*

“Tuhanin dihananne ngurung tanda' si ka'am: Niya' iyan budjang betteng duk nganak iye lella duk inēnan du iye Immanu'el – ma'ana Immanu'elin, “Tuhanin palamud si kite bi!” (Shi'ya 7:14; Mateo 1:23).

Magpakite Tuhanin meke'ulali' manamal palabey amban Nabi Shi'ya! Gara' Tuhanin we' papine Niyawanen diyalem lahatan nakanak budjangin – dende ga' bakas magdembuwa' duk lella! Subey sa miya'an AlMasihin inanakan tu'u si dunya. Kata'uhanbi ne, we' AlMasihin ga' niya' samane manusiya'. Dehellu amban inanakan iye, andang ne iye la'i si surga', pegge' iye **Lapal** magdembuwa' duk Tuhanin kemuwe ewwalley. Sa pina'al

we' Nabi Shi'yahin, AlMasihin **Tuhan tege baran manusiya'**. Bennal inin meke'ulali' te'ed! Tuhanin Niyawa du, maggara' iye mapī di Niyawanen duk Lapalnen dem lahatan nakanak budjangin ubus bu inanakan pitu si dunya manjari nakanak diki'! Iye hep pina'in we' Nabi Shi'yahin pagpa'inne: *“Niya' iyan budjang betteng duk nganak iye lella duk inēnan du iye Immanu'el – ma'ana Immanu'elin, “Tuhanin palamud si kite bi!”*

Si me' kapitulu mapaturul inin, ekka sinulat we' Nabi Shi'ya sabab papitu AlMasihin. Si me' ayat sinduwehin pa'inne:

“Me' a'a mapatenna' dem kalindemanin makakite danta' sahaya manamal. Tekka ne danta'in si me' a'a dem kalindemanin, me' matinalew mamateyin. Pegge' niya' nakanak inanakan para si kite bi, inurungan kite bi nakanak lella... Inēnan du iye iyan Kunsihal Mahāp Manamalin, Tuhan Mabalakatanin, Sama Salama-lamahin, Nakura' Kasanyanganin!” (Shi'ya 9:2,6) *“Waktu iyan makakite ne mapessekin duk makakale ne mabisuhin. Mapengka'in palaksu du kuwe' payew, duk ma'umewin maglingan hawal kēgden!”* (Shi'ya 35:5,6)

Si me' ayat inin inaka we' Nabi Shi'ya we' bo'o AlMasihin pinakitehan sutsi duk ase' Tuhanin pitu si dunya. Pina'al isab we' ne we' AlMasi maghinang hinangan balakatan bu ga' pe niya' mekehinang sa miya'an metu'uhin, supaya kēmon tasabutde we' iye du AlMasihin mapitu amban harapan Tuhanin! Iye jānnen hangkan nulat Nabi Shi'ya we' AlMasihin inēnan: *“Kunsihal Mahāp Manamalin! Tuhan Mabalakatanin! Sama Salama-lamahin! Nakura' Kasanyanganin!”* Duma'in Nabi Shi'ya kuwe' me' a'a sinduwehin ellew inin, pa'inde we' AlMasihin sali' du duk me' nabi sinduwehin. Kata'uhan Nabi Shi'ya hadjehan Manimbul sōng mapitu amban harapan Tuhanin.

Subey pe kite bi matsa dembuwa' kapitulu, iyan kapitulu **limempuktellu**. Inin kapitulu **mahāp manamalin si kēmon sinulat we' Nabi Shi'yahin**, pegge' diyalem sulatnen pina'al we' ne we' AlMasihin bu'us iyan laha'nen kuwe' bili-bili pegkurban, supaya tatanggunganne pangalegga duse kēmon manusiya'in. Pakale ka'am pahāp-hāp si me' Aka-aka Mahāp inaka we' Tuhanin pu Nabi Shi'yahin me' pitu' hatuſ tahun dehellu amban waktu AlMasihin.

Pa'in Kitabin:

(Shi'ya 53) ¹ *Sine mangahagad aka-aka kamihin? Sine makasabut iyehin we' amban balakat TUHANIN inin?* ² *Kabaya'an TUHANIN we' suligan dara'akannen (hātinen AlMasihin) kuwe' tunas kagkag dem bulak toho'. Ga' niya' mannisne atawa hāpne hangkan iye ga'i asipte bi. Ga' niya' bantukne hāp mekesinna-sinna kite bi.*

³ *Diniyawa'an iye duk tineykutan we' a'a; nandal kabinsana'an iye*

duk peddi'. Kuwe' iye a'a ga' niya' mabaya' mayamanne, kuwe' iye mangga' si kite bi, kuwe' ga' niya' baline. ⁴ *Saguwa' iye mato'ohin, nandal kabinsana'an iye patut si kite bi duk tanggunganne peddi' patut si kitehin bi. Kannalte bi we' ilegga duk pinapeddi'an iye we' Tuhanin sabab di dusene.* ⁵ *Saguwa' ilogsok iye sabab duseten bi, ilubakan iye sabab hinangante bi mala'atin; iye matewwa' leggahin sabab duseten bi bu timbul kite bi; duk sabab me' bakatnen kewuli'an kite bi.* ⁶ *Kēmon kite bi kuwe' me' bili-bili lepas, dangan-dangan kite bi nuhut di kabaya'anten bi. Pinaduwa' we' TUHANIN duseten bi kēmon diyata'ne.*

⁷ *Bininsana' iye saguwa' sandalanne, diyawa' ateynen, duk ga' iye kebbutan; kuwe' iye anak bili-bili sōng sinumbali', kuwe' bili-bili sōng kinekehan bulunen sandalanne kēmon, ga' iye missā.* ⁸ *Siniggew iye duk hinukum duk bino'o tahala' supaya pinapatey, duk ga' niya' suse si iye. Pinapatey iye sabab duse me' a'akun.* ⁹ *Kinubul iye si pagkubulan a'a mala'atin duk me' a'a madayahanin, bisan ga' niya' bakas hinangne la'at atawa magdusta'.* ¹⁰ *Saguwa' iye kabaya'an TUHANIN we' nandal kabinsana'an iye; kamateynen du, iye kurban maka'ampun dusehin. Hangkan kitene du iyan tubu'nen; ellum iye iyan, bu taha' umulnen, bu sabab iye manjari du maksud TUHANIN.* ¹¹ *Pag ubus iye nandal kabinsana'an, kēgan iye iyan balik duk kaduhulan. Pa'in Tuhanin, "Dara'akan bentel iye duk kasulutan ku si iye, tanggunganne du pangalegga me' a'a ma'ekkahin duk sabab iye jānnen hangkan siye ampunku.* ¹² *Urunganku iye lugal suku' si a'a pinahadje, lugal si ellet ma'importantehin duk mabalakatanin. Ngatu iye maglilla' umulnen duk ngatu iye kinimmatan a'a la'at. Ganti'anne me' a'a madusehanin duk māku-māku iye we' inampun siye."*

Inin sinulat we' Nabi Shi'ya sabab kabinsana'an sinandalan AlMasihin supaya tapuwasanne duseten bi. Awe', subey nandal kabinsana'an Manimbulin duk bu'us laha'nen sabab kēmon madusehanin supaya ta'ampun Tuhanin duseten bi bu masi pe iye bentel. Hangkan sinulat we' Nabi Shi'ya, pa'inne: "*Saguwa' ilogsok iye sabab duseten bi, ilubakan iye sabab hinangante bi mala'atin.... Kēmon kite bi kuwe' me' bili-bili lepas, dangan-dangan kite bi nuhut di kabaya'anten bi. Pinaduwa' we' TUHANIN duseten bi kēmon diyata'ne.*" (Shi'ya 53:5,6) Ayat duwe malalem inin – iye hāti lapal jūd Nabi Shi'yahin bang binissā pinapandak, duk iye **me' aka-aka la'at duk me' Aka-aka Hāp.**

1.) Ka'issa', **aka-aka la'at inin:** we' kēmon kite bi dusehan duk ga'i kite bi makajari nimbul dite! Hangkan sinulat we' Nabi Shi'ya, pa'inne: "*Kēmon kite bi kuwe' me' bili-bili lepas, dangan-dangan kite bi nuhut di kabaya'anten bi!*"

2.) Kaduwe, **Aka-aka Hāp inin**: we' niya' gara' Tuhanin nimbul madusehanin, duk gara'ne iyan palabey amban kamatey duk ka'ellum AlMasi balikin. Hangkan sinulat we' Nabi Shi'ya, pa'inne: **“Saguwa' ilogsok iye sabab duseten bi, ilubakan iye sabab hinangante bi mala'atin.... Pineduwa' we' TUHANIN duseten bi kēmon diyata'ne.”**

Me' bagayku, tasabutbi ke bang sa'ingge hadje dusebin si matahan Tuhan, Masutsihin? **Kahagad** ke ka'am we' AlMasihin, iye inanakan we' budjangin, we' iye **“Tuhanin palamud si kite bi”?** **Kata'uhanbi ke bang we'ey** AlMasihin subey bu'us laha'nen kuwe' bili-bili pagkurban?

Mikil-mikil ka'am sabab me' bissā Nabi Shi'ya inin, pegge' ngurung umul du inin. Mabaya' Tuhanin nabangan ka'am supaya tasabutbi kēmon sinulat we' Nabi Shi'ya dem kapitulu limempuktellu inin.

Hāp isab bakas pakale ka'am ellew inin. Karayaw iledjiki'an ka'am we' Tuhanin sasangbi mikil-mikil sabab Lapal Tuhanin palabey amban Nabi Shi'ya, pa'inne:

Pa'in TUHANIN, “Dayi' ka'am, magsara' ne kite bi. Bisan dusebin peyat kuwe' laha', makajari du ngapote' kuwe' kakana'; bisan dusebin peyat manamal ngapote' du kuwe' gapas!” (Shi'ya 1:18)

Wassalam